

陝西通志



第七十七卷


紀事二

後漢

魏

DS  
793  
S45S5  
1735  
v.77







陝西通志第七十七卷

紀事二 後漢 蜀漢 魏

**後漢**

光武帝建武元年夏六月長安亂更始奔新豐

張邛守河東爲鄧禹所破還奔長安與諸將議曰赤眉近在華陰旦暮且至長安見滅不久不如掠城中以自富轉攻所在東歸南陽入說更始更始怒使王匡陳牧成丹趙萌屯新豐李松軍挾以拒之

續漢志曰新豐有鴻門亭挾城卽此

張邛廖湛胡殷申屠建等與隗囂謀劫更

始侍中劉能卿知其謀以告更始召邛等入將悉誅之隗囂不至更始使邛等待於外廬邛與湛殷疑有變遂突出獨申屠建在斬之邛與湛殷勒兵掠東西市燒門入戰更始大敗奔新豐復疑王匡陳牧成丹與邛等同謀乃並召入牧丹先至卽斬之匡懼將兵



入長安與邛等合

後漢書  
劉元傳

赤眉以劉盆子稱帝於華陰

赤眉進至華陰軍中有齊巫鼓舞祠城陽景王巫狂言景王大怒  
曰當爲縣官何故爲賊軍中警動方望弟陽說崇等立宗室扶義  
誅伐乃相議求劉氏共尊立之遂立盆子爲帝初赤眉過式掠盆  
子及二兄恭茂皆在軍中恭隨崇等降更始卽封式侯在長安盆  
子與茂留軍中及崇等欲立帝求軍中景王後惟盆子與茂及前  
西安侯孝最爲近屬乃書札爲符又以兩空札置笥中盆子等三  
人以年次探札盆子最幼後探得符諸將皆稱臣拜盆子時年十  
五被髮徒跣敝衣赭汗見衆拜恐畏欲啼茂謂曰善藏符盆子卽  
齧折棄之

後漢書劉  
盆子傳

秋七月大司徒鄧禹渡河破左輔兵於衙



禹自汾陰渡河入夏陽更始左輔都尉公乘歛引衆十萬與左馮翊兵共拒禹於衙禹破走之

通鑑。按地理志衙故城在今白水縣東北

八月更始復入長安

李松還從更始與趙萌共攻匡邛於城內連戰月餘匡等敗走更

始徙居長信宮

後漢書  
劉元傳

九月赤眉入長安更始奔高陵詔封更始爲淮陽王

赤眉至高陵匡等迎降之遂共連兵而進更始城守使李松出戰赤眉生得松松弟汎爲城門校尉赤眉使使謂之曰開門活汝兄

汎卽開門九月赤眉入城更始單騎走侍中劉恭以赤眉立其弟

盆子自繫詔獄聞敗乃出步從至高陵右輔都尉嚴本恐失更始

爲赤眉所誅將兵在外號爲屯衛而實囚之

後漢書  
劉元傳

上聞更始失

城守未知所在詔封更始爲淮陽王敢有害及妻子者罪大逆其



送詣吏者封列侯

袁宏後漢紀

冬十月淮陽王降赤眉

赤眉下書曰聖公降者封長沙王過二十日勿受更始遣劉棻請降赤眉使其將謝祿往受之十月更始詣長樂宮上璽綬於盆子赤眉坐更始置庭中將殺之劉棻謝祿爲請不能得遂引更始出劉棻追呼曰臣誠力極請得先死拔劍欲自刎赤眉率樊崇等共救止之乃赦更始封爲長沙王更始常依謝祿居劉棻亦擁護之

後漢書  
劉元傳

鄧禹引軍屯枸邑

劉盆子居長樂宮三輔郡縣遣使貢獻兵士輒剽奪之又數暴掠吏民百姓不知所歸聞鄧禹乘勝獨克而師行有紀皆望風相攜負以迎軍禹所止輒停車拄節以勞來之父老童穉滿其車下莫



不感悅諸將豪傑皆勸禹徑攻長安禹曰不然今吾衆雖多能戰者少赤眉新拔長安財穀充實鋒銳未可當也吾且休兵北道就糧養士以觀其敝乃可圖也於是引軍北至栒邑所到諸營保郡邑皆開門歸附

通鑑○按地理志栒邑屬右扶風

張宗爲偏將軍從鄧禹軍到栒

邑赤眉大衆且至禹以栒邑不足守欲引師進就堅城而衆人多畏賊追憚爲後拒禹乃書諸將名於竹簡署其前後亂着笥中令各探之宗獨不肯探云死生有命張宗豈辭難就逸乎禹歎息謂曰將軍有親弱在營奈何不顧宗曰愚聞一卒畢力百人不當萬夫致死可以橫行宗今擁兵數千以承天威何遽知其必敗乎遂留爲後拒諸營旣引兵宗方勒厲軍士堅壘以死當之禹到前縣議曰以張將軍之衆當百萬之師猶以小雪投沸湯雖欲戮力其勢不全也乃遣步騎二千人反還迎宗宗引兵始發而赤眉卒至



宗與戰卻之乃得還營於是諸將服其勇還到長安夜將銳士入城襲赤眉中矛貫髀又轉攻諸營堡爲流矢所激皆幾至於死

後漢

書張宗傳

十二月赤眉殺淮陽王

三輔苦赤眉暴虐皆憐更始而張邛等以爲慮謂謝祿曰今諸營長多欲篡聖公者一旦失之合兵攻公自滅之道也於是祿使從兵與更始共牧馬於郊下因令縊殺之劉恭夜往收藏其屍光武聞而傷焉詔大司徒鄧禹葬之於霸陵

後漢書  
劉元傳

將軍馮愔反於枸邑

帝以關中未定而禹久不進兵勅曰司徒堯也亡賊桀也長安吏人遑遑無所依歸宜以時進討鎮慰西京繫百姓之心禹猶執前意別攻上郡諸縣更徵兵引穀歸至大要遣馮愔宗歆守枸邑二



人爭權相攻愾遂殺歆因反擊禹禹遣使以聞帝問使人愾所親  
愛爲誰對曰護軍黃防帝度愾防不能久和因報禹曰縛馮愾者  
必黃防也乃遣尚書宗廣持節往降之防果縛愾歸罪

後漢書  
鄧禹傳

二年春正月赤眉大掠長安而西鄧禹入長安

劉恭見赤眉衆亂知其必敗自恐兄弟俱禍密教盆子歸璽綬習  
爲辭讓之言正月朔崇等大會恭先曰諸君立恭弟爲帝且一年  
肴亂日甚誠不足以相成願得退爲庶人更求賢知盆子乃下牀  
解璽綬叩頭曰今設置縣官而爲賊如故吏人貢獻輒見剽劫流  
聞四方莫不怨恨此皆立非其人所致願乞骸骨避賢聖必欲殺  
盆子以塞責者無所離死因涕泣噓唏崇等及會者數百人莫不  
哀憐之乃皆避席頓首曰臣無狀負陛下請自今以後不敢復放  
縱因共抱持盆子帶以璽綬旣罷出各閉營自守三輔翕然百姓



爭還長安市里且滿二十餘日赤眉貪財物復出大掠城中糧食盡遂收載珍寶縱火焚宮室引兵而西過祠南郊車甲兵馬最爲猛盛衆號百萬乃自南山轉掠城邑與更始將軍嚴春戰於郿破春殺之遂入安定北地

後漢書劉盆子傳

時赤眉西走扶風禹乃南至長

安軍昆明池大饗士卒率諸將齋戒擇吉日修禮謁祠高廟收十一帝神主遣使奉詣洛陽因循行園陵爲置吏奉守焉

鄧禹傳

二月延岑自稱武安王於漢中

建武二年延岑復反攻漢中圍南鄭漢中王嘉兵敗走岑遂據漢中進兵武都爲更始柱功侯李寶所破走天水公孫述遣將侯丹取南鄭嘉收散卒得數萬人以寶爲相從武都南擊侯丹不利還軍河池下辨復與延岑連戰岑引北入散關

散關故城在今陳倉縣南十里

至陳

倉嘉追擊破之

通鑑



秋九月赤眉發諸陵復入長安鄧禹戰不利走雲陽

赤眉入北地至陽城番須中逢大雪坑谷皆滿士多凍死乃復還

發掘諸陵大司徒鄧禹時在長安遣兵擊之於郁夷

郁夷縣名屬右扶風反

爲所敗禹乃出之雲陽九月赤眉復入長安止桂宮

長安記曰桂宮在未央宮

北時漢中賊延岑出散關屯杜陵逢安將十餘萬人擊之鄧禹以

逢安精兵在外唯盆子與羸弱居城中乃自往攻之會謝祿救之

夜戰橐街中禹兵敗走

後漢書劉盆子傳○按本紀赤眉發掘園陵在二年正月盆子傳謂安定既還乃發

諸陵鄧禹遣擊不克走雲陽赤眉復入長安事在九月與本紀互異而司馬通鑑因焉今從之

延岑大破赤眉於杜陵

延岑及更始將軍李寶合兵數萬與逢安戰於杜陵岑等大敗寶

遂降安而岑收散卒走寶乃密使人謂岑曰子努力還戰吾當於

內反之岑卽還挑戰安等空營擊之寶從後悉拔赤眉旗幟更立



已幡旗安等戰疲還營見旗幟皆白大驚亂走自投川谷死者十

餘萬人逢安與數千人脫歸長安

後漢書劉盆子傳

漢中王嘉大破赤眉於谷口帝令鄧禹招降之

廖湛將赤眉十八萬攻漢中王嘉嘉與戰於谷口大破之嘉手殺

湛遂到雲陽就穀嘉妻兄新野來歙帝之姑子也帝令鄧禹招嘉

嘉因歙詣禹降

通鑑。按谷口故城在今醴泉縣東北四十里

冬十一月孫登僭號於上郡

銅馬青犢尤來餘賊共立孫登爲天子於上郡登將樂元殺登以

其衆五萬餘人降

後漢書光武帝紀。按上郡今綏德州

遣偏將軍馮異入關代鄧禹伐赤眉十二月馮異破赤眉於華陰

時赤眉延岑暴亂三輔郡縣大姓各擁兵衆大司徒鄧禹不能定

乃遣馮異代禹討之帝送至河南賜以乘輿七尺貝劔勅異曰三



輔遭王莽更始之亂重以赤眉延岑之酷今之征伐非必畧地屠城要在平定安集之耳鄉本能御史士念自修勅無爲郡縣所苦異頓首受命引而西所至皆布威信弘農羣盜稱將軍者十餘輩皆率衆降異與赤眉遇於華陰相拒六十餘日戰數十合降其將劉始王宣等五千餘人

後漢書  
馮異傳

三年春正月以馮異爲征西大將軍夏四月馮異擊敗延岑於上林關中平

時赤眉雖降衆寇猶盛延岑據藍田王歆據下邳芳丹據新豐蔣震據霸陵張邯據長安公孫守據長陵陽周據谷口呂賄據陳倉角閼據汧駱蓋延據盩厔任良據鄠汝章據槐里各稱將軍擁兵多者萬餘人少者數千人轉相攻擊異且戰且行屯軍上林苑中延岑旣破赤眉拜置牧守欲據關中引張邯任良共攻異異擊破



之諸營保附岑者皆來降岑遂自武關走南陽時百姓饑餓委輸  
不至軍士悉以果實爲糧詔拜趙匡爲右扶風將兵助異并送纁  
穀異兵食漸盛乃稍誅擊豪傑不從令者褒賞降附有功勞者悉  
遣其渠帥詣京師散其衆歸本業關中悉平

後漢書  
馮異傳

四年冬十二月公孫述遣兵屯陳倉隗囂遣兵助馮異擊破之

公孫述積糧漢中築宮南鄭又造十層赤樓帛蘭舩多刻天下牧  
守印章使將軍李育程烏將數萬衆出陳倉與呂鮪狗三輔征西  
將軍馮異擊鮪育於陳倉大敗之鮪育奔漢中

後漢書公  
孫述傳

囂既有

功於漢又受鄧禹爵署其腹心議者多勸通使京師囂乃上書詣  
關光武素聞其風聲報以殊禮言稱字用敵國之儀所以慰籍之  
良厚時陳倉人呂鮪擁衆數萬與公孫述通寇三輔囂復遣兵佐  
征西大將軍馮異擊之走鮪遣使上狀帝報以手書恩禮愈篤其



後公孫述數出兵漢中遣使以大司空扶安王印綬授囂囂自以與述敵國耻爲所臣乃斬其使出兵擊之連破述軍以故蜀兵不

復北出

魏囂傳○按述將程烏馮異傳作程焉

五年冬十二月盧芳僭號於九原

王莽時天下咸思漢德芳詐稱武帝曾孫劉文伯乃與三水屬國羌胡起兵更始至長安徵芳爲騎都尉更始敗三水豪傑共計議立芳爲上將軍西平王使使與西羌單于結和親單于乃使句林王將數十騎迎芳遂立芳爲漢帝初五原人李興隨昱朔方人田颯代郡人石鮪閔湛各起兵自稱將軍建武四年單于遣無樓且渠王入五原塞與李興等和親告興欲令芳還漢地爲帝五年李興引兵至單于庭迎芳與俱入塞都九原縣掠有五原朔方雲中定襄雁門五郡並置守令侵苦北邊

後漢書盧芳傳



六年夏四月帝如長安謁園陵遣兵擊漢中

夏四月丙子幸長安始謁高廟遂有事十一陵遣蓋延等七將軍

從隴道伐公孫述五月己未至自長安

後漢書光武帝紀

李通為前將軍

六年夏領破姦將軍侯進捕虜將軍王霸等擊漢中賊

謂延公孫

述遣兵赴救通等與戰於西城破之

李通傳○按注西城縣屬漢中郡

五月隗囂反使其將王元據隴坻諸將戰不利引還

諸將從隴道擊蜀隗囂使王元據隴坻伐木塞道諸將戰不利還

屯三輔

袁宏後漢紀

時漢軍不利引下隴囂兵追急武選精騎還為後

拒身被甲持戟奔擊殺數千人囂兵乃退諸將得還長安

後漢書馬武傳○按明一

統志隴坻在鳳翔府西北四十里即隴山也

冬十二月隗囂遣兵下隴馮異祭遵共擊破之

諸將之下隴也帝詔耿弇軍漆

一統志云漆縣名後周改永壽縣

馮異軍柁邑祭



遵軍汧吳漢等還屯長安馮異引軍未至栒邑隗囂乘勝使王元行巡將二萬餘人下隴分遣巡取栒邑異卽馳兵潛往閉城偃旗鼓行巡不知馳赴之異卒擊鼓建旗而出巡軍驚亂奔走追擊大破之祭遵亦破王元於汧於是北地諸豪長耿定等悉叛隗囂降

異

通鑑

馮異擊盧芳匈奴兵破之北地上郡皆降

異進軍義渠領北地太守事擊盧芳將賈覽匈奴冀韃日逐王破

之上郡安定皆降異

後漢書  
馮異傳

七年冬盧芳朔方郡降

芳以事誅其五原太守李興兄弟而其朔方太守田颯雲中太守

橋扈恐懼叛芳舉郡降光武復令領職如故

後漢書  
盧芳傳

八年夏閏四月帝如關中征隗囂



上西征至漆議者以爲車駕不宜入險且遣諸將觀虛實議未定會馬援至勸上曰囂衆瓦解兵進必破以米爲山谷于上前指衆軍所入處上笑曰虜在吾目中矣車駕遂進竇融與五郡太守將步騎數萬輜重五千兩與上會第一囂衆大潰城邑皆降囂將妻子保西州吳漢岑彭引兵追守之

袁宏後漢紀

冬十一月吳漢岑彭等引兵還長安

公孫述將救囂乘高卒至漢兵未及陳囂得逃出入冀漢軍食盡

吳漢岑彭燒輜重歸長安

袁宏後漢紀

九年夏六月遣來歙監護諸軍屯長安馬援副之

帝使來歙悉監護諸將屯長安太中大夫馬援爲之副歙上書曰公孫述以隴西天水爲藩蔽故得延命假息今二郡蕩平則述智計窮矣宜益選兵馬儲積資糧今西州新破兵人疲饑若招以財



穀則其衆可集帝然之於是詔於汧積穀六萬斛

綱目

十年秋八月帝如長安遂至汧

八月己卯幸長安祠高祖廟上將討高峻寇恂諫曰車駕止長安隴西足以震懼且去關東不遠此從容一處而制四方今士馬勞倦遠履險阻非萬乘之固也前年潁川之役可以爲戒上不從進及汧高峻不降上謂恂曰公前止吾今爲吾行矣恂至第一峻遣軍師皇甫文詣恂辭禮不屈恂怒斬之遣其副歸峻卽日開城與

囂純等降

袁宏後漢紀

十一年秋七月帝如長安

帝自將征公孫述秋七月次長安

後漢書光武帝紀

十三年春二月盧芳犇匈奴五原郡降

芳與賈覽共攻雲中不下其將隨昱守九原欲脅芳降芳知羽翼



外附心膂內離遂棄輜重與十餘騎亡入匈奴其衆盡歸隨昱昱

乃隨使者程恂詣闕拜昱爲五原太守

後漢書  
盧芳傳

十八年春帝如長安

二月甲寅西巡狩幸長安三月壬午祠高廟遂有事十一陵歷馮

翊界夏四月甲戌車駕還宮

後漢書光  
武帝紀

二十二年春閏正月帝如長安

閏正月丙戌幸長安祠高廟遂有事十一陵

後漢書光  
武帝紀

二十四年春正月匈奴南邊八部立日逐王比爲南單于款五原塞

匈奴八部大人共議立日逐王比爲呼韓邪單于款五原塞願求

爲藩蔽捍禦北虜事下公卿議者皆以爲不可許獨五官中郎將

耿國以爲宜如孝宣故事受之帝從之

通鑑

二十六年冬徙南單于居西河美稷



冬五骨都侯子將其衆三千人歸南部北單于使騎追擊悉獲其衆南單于遣兵拒之逆戰不利於是復詔單于徙居西河美稷令西河長史歲將騎二千弛行五百人助中郎將衛護單于南單于既居西河亦列置諸部王助爲扞戍北地朔方五原皆領部衆爲郡縣偵邏耳目

後漢書南匈奴傳○美稷在今榆林東北

中元元年夏四月帝如長安

四月戊子行幸長安祀長陵

袁宏後漢紀

明帝永平二年冬十月帝如長安

十月西巡狩幸長安祠高廟遂有事於十一陵十一月遣使者以

中牢祠蕭何霍光帝謁園陵過式其墓

後漢書明帝紀

五年冬北匈奴寇五原南單于擊却之

北匈奴六七千騎入於五原塞南單于擊却之西河長史馬襄赴



救虜乃引去

後漢書南匈奴傳

八年春三月初置度遼將軍屯五原曼柏

北單于欲合市遣使求和親顯宗許之八年遣越騎司馬鄭衆北使報命而南部湏卜骨都侯等知漢與北虜交使懷嫌怨欲畔密因北使令遣兵迎之鄭衆出塞疑有異伺候果得湏卜使人乃上言宜更置大將以防二虜交通由是始置度遼營以中郎將吳棠行度遼將軍事副校尉來苗左校尉閻章右校尉張國將黎陽虎牙營士屯五原曼柏又遣騎都尉秦彭將兵屯美稷其年秋北虜果遣二千騎候望作馬革船欲度迎南部畔者以漢有備乃引去

後漢書南匈奴傳○按鑑注曼柏在勝州銀山縣界

章帝建初七年冬十月帝如長安

十月癸丑西巡狩幸長安丙辰祠高廟遂有事於十一陵遣使者



祠太上皇於萬年以中牢祠蕭何霍光進幸槐里岐山又幸長平御池陽宮東至高陵造舟於涇而還每所幸輒會郡縣吏人勞賜

作樂

後漢書章帝紀

八年夏六月北匈奴大人款五原塞降

北匈奴三木樓訾大人稽留斯等率三萬八千人馬二萬匹牛羊

十餘萬款五原塞降

後漢書南匈奴傳

章和元年冬十月北匈奴五十八部來降

鮮卑擊北匈奴破之斬優留單于北庭大亂屈蘭儲卑胡都湏等

五十八部詣五原朔方北地降

後漢書南匈奴傳

和帝永元元年夏六月遣將軍竇憲等伐匈奴

車騎將軍竇憲出雞鹿塞

在朔方臨渾縣

度遼將軍鄧鴻出桐楊塞

屬九原郡

故城在勝州銀城縣

南單于出蒲藁谷與北匈奴戰於稽落山大破之登燕



然山刻石勒功而還

後漢書  
和帝紀

二年冬十月南單于出鷄鹿塞擊北匈奴大破之

遣行中郎將班固報命南單于遣左谷蠡王師子出鷄鹿塞擊北

匈奴於河雲北大破之

後漢書  
和帝紀

三年冬帝如長安詔竇憲與車駕會

十月癸未行幸長安賜行所過二千石長吏以下及三老官屬錢

帛各有差十一月癸卯祠高廟遂有事十一陵

後漢書  
和帝紀

冬幸長安

詔令大將軍憲與車駕會長安時尚書見憲皆欲釋伏稱萬歲尚

書令韓稜曰枉道事人臣非所以立身也且禮無為人臣稱萬歲

之制左右皆慚遂已

後漢  
紀

六年春正月使匈奴中郎將杜崇等殺南單于安國於五原立左賢

王師子為單于



六年春以執金吾朱徽行度遼將軍時單于與中郎將杜崇不相平乃上書告崇崇諷令西河太守斲單于章無由自聞崇因與徽上言南單于安國疎遠故胡親近新降欲殺左賢王師子及左臺且渠劉利等又右部降者謀共迫脇安國起兵背降請西河上郡安定爲之儆備下公卿議以爲宜遣有方畧使者之單于庭與杜崇朱徽及西河太守並力觀其動靜帝從之於是徽崇遂發兵造其庭安國夜聞漢軍至大驚棄帳去因舉兵及將新降者欲誅師子師子先知乃悉將廬落入曼柏城安國追到城下門閉不得入徽遣吏曉譬和之安國不聽城旣不下乃引兵屯五原崇徽因發諸郡騎追赴之急衆大恐安國舅喜爲等乃格殺安國子師子立

後漢書南匈奴傳

安帝永初二年冬十一月羗寇三輔殺漢中太守董炳校尉梁懂破



走之

滇零等自稱天子於北地招集武都參狼上郡西河諸雜種衆遂

大盛南入益州殺漢中太守董炳遂寇鈔三輔斷隴道

後漢書  
滇零傳

受詔當屯金城聞羗轉寇三輔迫近園陵卽引兵赴擊之轉戰武

功美陽關謹臨陣被創不顧連破走之盡還得所掠生口獲馬畜

財物甚衆羗遂奔散朝廷嘉之數璽書勞勉委以西方事令爲諸

軍節度

梁謹傳

三年春遣騎都尉任仁督諸郡屯兵救三輔

仁戰每不利衆羗乘勝漢兵數挫

後漢書  
西羗傳

秋九月烏桓鮮卑南匈奴合兵寇五原

鴈門烏桓率衆王無何允與鮮卑大人及南匈奴合七千騎寇五

原與太守戰於九原高渠谷漢兵大敗殺郡長吏

後漢書  
烏桓傳



冬十月南匈奴圍中郎將耿种于美稷

漢人韓琮隨南單于入朝既還說南單于云關東水潦人民饑餓死盡可擊也單于信其言遂起兵反攻中郎將耿种於美稷冬遣行車騎將軍何熙副中郎將龐雄擊之

後漢書南匈奴傳

四年春正月梁慄破南匈奴於屬國故城

單于圍耿种數月种移檄求救慄將八千餘人馳往赴之至屬國故城與匈奴左將軍烏桓大人戰破其渠帥殺三千餘人虜其妻子獲財物甚衆單于復自將七八千騎迎攻圍慄慄被甲奔擊所

向皆破虜遂引還虎澤

後漢書梁慄傳○按鑑注屬國故城在美稷縣

二月詔任尚還軍長安

元年十二月詔車騎將軍鄧騭征西校尉任尚將五營及諸郡兵屯漢陽以備羌尚軍久出無功民廢農桑乃詔尚將吏民還屯長



安通鑑

三月梁懂等追南匈奴及虎澤降之

三月何熙軍到五原曼柏暴疾不能進遣龐雄與懂及耿种步騎萬六千人攻虎澤連營稍前單于惶怖遣左薁鞬日逐王詣懂乞降懂大陳兵受之單于脫帽徒跣面縛稽顙納質會熙卒卽拜懂

度遼將軍

後漢書  
梁懂傳

羌寇褒中漢中太守鄭勤戰歿

滇零遣人寇褒中燔燒郵亭大掠百姓於是漢中太守鄭勤移屯褒中羌復攻褒中勤欲擊之主簿段崇諫以爲虜乘勝鋒不可當宜堅守之勤不從出戰大敗死者三千人段崇及下史王宗原展

以身扞刃與勤俱死

後漢書  
西羌傳

五年春三月徙緣邊郡縣避寇



羗既轉盛二千石令長多內郡人並無戰守意皆爭上徙郡縣以避寇難朝廷從之遂移安定徙美陽北地徙池陽上郡徙衙百姓戀土不樂去舊乃刈其禾稼發徹室屋夷營壁破積聚驅蹙劫畧隨道死亡或隕棄老弱或爲人僕妾喪其大半

後漢書西羗傳

元初元年春羗寇雍城

滇零死子零昌代立以杜季貢爲將軍元初元年春零昌遣兵寇

雍城

後漢書西羗傳○按雍城屬右扶風

夏六月羗寇漢中五官掾程信擊破之

號多與當煎勒姐大豪共脅諸種分兵鈔掠漢中巴郡板楯蠻將兵救之漢中五官掾程信率郡兵與蠻共擊破之號多退走還斷

隴道與零昌通謀

後漢書西羗傳

二年秋八月遣屯騎校尉班雄屯三輔司馬鈞督關中兵



詔班雄屯三輔又遣左馮翊司馬鈞行征西將軍事督右扶風仲  
光安定太守杜恢北地太守包盛京兆虎牙都尉耿縛右扶風都  
尉皇甫旗等合八千餘人又龐參將羌胡兵七千餘人與鈞分道  
並進後並擊零昌鈞遁還坐徵自殺參以失期軍敗抵罪後漢書  
西羌傳  
冬遣中郎將任尚屯三輔

遣任尚爲中郎將將羽林緹騎五營子弟三千五百人代班雄屯  
三輔尚臨行虞詡說尚曰兵法弱不攻強走不逐飛自然之勢也  
今虜皆馬騎日行數百來如風雨去如絕絃以步追之勢不相及  
所以雖屯兵二十餘萬曠日而無功也爲使君計莫如罷諸郡兵  
各令出錢數千二十人共市一馬以萬騎之衆逐數千之虜追尾  
掩截其道自窮使人利事大功立矣尚大喜卽上言用其計後漢  
書西



延光元年秋七月虔人羌與上郡胡反度遼將軍耿夔擊破之

虔人種羌與上郡胡反攻穀羅城

穀羅屬西河郡

度遼將軍耿夔將諸郡

兵及烏桓騎赴擊破之

後漢書西羌傳

二年冬十二月鮮卑敗南匈奴於曼柏

鮮卑既累殺郡守膽氣轉盛控絃數萬騎延光二年冬其至

鮮卑

大人自將萬餘騎入東領候分爲數道攻南匈奴於曼柏薁鞬日

逐王戰死殺千餘人

後漢書鮮卑傳

三年冬十月帝如長安

十月行幸長安丁亥會三輔守令掾史於長安作樂閏月丁未祠

高廟遂有事十一陵歷觀上林昆明池遣使者祠太上皇於萬年

以中牢祠蕭何曹參霍光

後漢書安帝紀

順帝永建四年秋九月復北地上郡徙者各歸舊土



虞詡言安定北地上郡山川險阨沃野千里土宜畜牧水可漑灌  
頃遭元元之灾衆羗内潰郡縣兵荒二十餘年夫棄沃壤之饒捐  
自然之財不可謂利離山河之阻守無險之處難以爲固今三郡  
未復園陵單外而公卿選懦張解設難但計所費不圖其安宜開  
聖聽考行所長九月詔復北地上郡還舊土通鑑  
陽嘉四年冬十月度遼將軍耿煜敗烏桓蘭池城

烏桓寇雲中遮截道上商賈車牛千餘兩度遼將軍耿煜率二千  
餘人追擊不利又戰於沙南屬雲中郡斬首五百級烏桓遂圍煜

於蘭池城於是發積射士二千人度遼營千人配上郡屯以討烏

桓烏桓乃退後漢書烏桓傳

永和二年冬十月帝如長安

十月甲申行幸長安庚子幸未央宮會三輔郡守都尉及官屬勞



賜作樂十一月丙午祠高廟丁未遂有事十一陵

後漢書  
順帝紀

五年春二月南匈奴圍美稷夏五月度遼將軍馬續討破之

南匈奴左都句龍王吾斯車紐等背畔率三千餘騎寇西河因復

招誘右賢王合七八千騎圍美稷殺朔方代郡長史馬續與中郎

將梁並烏桓校尉王元發緣邊兵及烏桓鮮卑羌胡合二萬餘人

掩擊破之

後漢書南  
匈奴傳

羌寇三輔遣兵擊之

且凍傳難種羌反與雜種羌胡大寇三輔殺害長吏於是發京師

近郡及諸州兵討之

後漢書  
西羌傳

匈奴引烏桓羌胡入寇殺上郡都尉等官徙緣邊諸郡

秋句龍吾斯等立句龍王車紐爲單于東引烏桓西收羌戎及諸

胡等數萬人攻破京兆虎牙營殺上郡都尉及軍司馬乃徙西河



陝西通志卷之二十一

治離石離石西河屬縣上郡治夏陽朔方治五原後漢書南匈奴傳

六年春閏正月鞏唐羌寇三輔燒園陵

鞏唐羌三千餘騎燒園陵掠關中殺傷長吏郃陽令任頽追擊戰

死遣中郎將龐參募勇士千五百人頓美陽為涼州援後漢書西羌傳永

和六年西羌大寇三輔征西將軍馬賢將諸郡兵擊之不能克郡

將知規有兵畧乃命為功曹使率甲士八百與羌戰賊退皇甫規傳

冬十月徙安定北地郡十一月遣車騎將軍張喬將兵屯三輔

諸種羌八九千騎寇武威涼部震恐於是復徙安定居扶風北地

居馮翊遣行車騎將軍執金吾張喬將左右羽林五校士及河西

南陽汝南兵萬五千人屯三輔後漢書西羌傳

桓帝和平元年春二月扶風妖人作亂討平之

扶風妖賊裴優自稱皇帝伏誅後漢書桓帝紀



永壽元年秋南匈奴寇美稷都尉張奐擊降之

南匈奴左薁鞬臺耆且渠伯德等七千餘人寇美稷東羌復舉種

應之與壁唯有二百許人聞卽勒兵出進屯長城遣將王衛招誘

東羌因據龜茲縣上郡屬縣名使匈奴不得交通東羌諸豪遂與奐共

擊薁鞬等連戰破之伯德惶恐將其衆降郡界以寧羌豪帥感奐

恩德上馬二十匹先零酋長又遺金鑠八枚與召主簿於諸羌前

以酒酹地曰使馬如羊不以入廐使金如粟不以入懷悉以金馬

還之羌性貪而貴吏清前有八都尉率好財貨爲所患苦及奐正

已率屬威化大行後漢書張奐傳

延熹二年冬十月帝如長安

十月壬申行幸長安乙酉幸未央宮甲午祠高廟十一月庚子遂

有事十一陵後漢書桓帝紀



四年夏六月羗寇三輔

零吾復與先零及上郡沈氏牢姐諸種并力寇并涼及三輔

後漢書西

羗傳

永康元年春正月羗寇三輔

春東羗先零五六千騎寇關中圍役栩

耀州同官縣本漢役栩地

掠雲陽夏復

攻沒兩營殺千餘人

後漢書張奐傳

冬十月羗寇三輔使中郎將張奐擊破之

冬羗岸尾摩瑩等脅同種復鈔三輔奐遣司馬尹端董卓並擊大

破之斬其酋豪首虜萬餘人三州清定論功當封奐不事宦官故

賞遂不行唯賜錢二十萬除家一人爲郎並辭不受而願徙屬弘

農華陰舊制邊人不得內徙唯奐因功特聽

後漢書張奐傳

靈帝建寧元年夏破羗將軍段熲追羗於奢延破之



頰將兵萬餘人直指高平與先零諸種戰於逢義山虜衆大潰頰復追羗出橋門至走馬水上尋聞虜在奢延乃將輕兵兼行一日一夜二百餘里晨及賊擊破之

後漢書  
段熲傳

中平二年春三月北宮伯玉等寇三輔詔車騎將軍皇甫嵩等討之

嵩旣破黃巾威震天下會邊章韓遂作亂詔嵩廻鎮長安以衛園

陵章遂等復入寇三輔使嵩因討之

後漢書  
皇甫嵩傳

伯玉等劫致金城

人邊章韓遂將萬騎入寇三輔侵逼園陵詔以卓爲中郎將副左

車騎將軍皇甫嵩征之

董卓傳

秋八月遣車騎將軍張溫屯美陽討北宮伯玉冬十一月將軍董卓破走之

嵩以無功免歸而邊章韓遂等大盛朝廷復以司空張溫爲車騎將軍執金吾袁滂爲副拜卓破虜將軍與溫寇將軍周慎並統于



溫并諸郡兵步騎合十餘萬屯美陽章遂亦進兵美陽溫卓與戰輒不利十一月夜有流星如火光照章遂營中驢馬盡鳴賊以爲不祥欲歸金城卓聞之喜明日乃與右扶風鮑鴻等并兵俱攻大破之斬首數千級章遂敗走溫乃遣周慎將三萬人追之時衆軍敗退唯卓全師而還屯於扶風

後漢書  
董卓傳

四年春二月扶風人馬騰反寇掠三輔

韓遂殺邊章伯玉擁兵十萬殺涼州刺史耿鄙而鄙司馬扶風馬騰亦擁兵反叛又漢陽王國自號合衆將軍皆與韓遂合共推王國爲主悉令領其衆寇掠三輔

後漢書  
董卓傳

五年冬十一月王國圍陳倉以皇甫嵩爲左將軍討之

五年梁州賊王國圍陳倉復拜嵩爲左將軍督前將軍董卓各率二萬人拒之卓欲速進赴陳倉嵩不聽卓曰智者不後時勇者不



留決速救則城全不救則城滅全滅之勢在於此也嵩曰不然百戰百勝不如不戰而屈人之兵是以先爲不可勝以待敵之可勝不可勝在我可勝在彼彼守不足我攻有餘有餘者動非九天之上不足者陷於九地之下今陳倉雖小城守固備非九地之陷也王國雖強而攻我之所不救非九天之勢也夫勢非九天攻者受害陷非九地守者不拔國今已陷受害之地而陳倉保不拔之城我可不煩兵動衆而取全勝之功將何救焉遂不聽王國圍陳倉自冬迄春八十餘日城堅守固竟不能拔賊自解去後漢書皇甫嵩傳蓋勲爲京兆尹是時王國衆十餘萬三輔震動勲請發兵萬人分屯三輔每有密事帝呼詔問數加賞賜袁宏後漢紀

六年春二月皇甫嵩大破王國於陳倉王國走死

國衆疲敝自解去嵩進兵擊之董卓曰不可兵法窮寇勿追歸衆



勿迫嵩曰不然前吾不擊避其銳也今而擊之待其衰也所擊疲師非歸衆也國衆且走莫有鬪志以整擊亂非窮寇也遂獨進擊之使卓爲後拒連戰大破之斬首萬餘級國走而死卓大慙恨由是忌嵩

後漢書皇甫嵩傳

獻帝初平元年春遷都長安

董卓以山東兵盛欲徙都長安召公卿議曰高祖都關中十一世後漢中興東都洛陽從光武至今復十二世案石苞室讖宜還都長安百官無敢應者司徒楊彪曰遷都改制天下大事昔盤庚五遷殷民胥怨故作三章以曉諭之往者王莽篡逆更始赤眉之亂焚燒長安殘害百姓人民流亡百無一存光武受命更都雒陽此其宜也今建立聖主光隆漢祚而無故捐宗廟宮殿棄先帝園陵恐百姓驚愕必麋沸螳聚以致擾亂石苞室讖妖邪之書豈可信



用卓作色曰楊公欲沮國家計耶關東黃巾作亂所在賊起長安  
峻函險固國之重防又隴右取材木功夫不難杜陵南山下有武  
帝故陶作甄處一朝一夕可辦宮室官府盡何足言百姓小人何  
足與議若有前却以我大兵驅之豈得自在百僚皆失色太尉黃  
琬曰此大事楊公語得毋可思乎司空荀爽曰相國豈樂遷都耶  
山東兵起非可一日禁也而關西尚靜故當遷之以圖秦漢之勢  
也堅爭不止禍必有所歸卓使有司奏免二公二月丁亥天子遷  
都長安卓留屯雒陽徙民長安三月己巳車駕至長安遭赤眉之  
亂宮室焚盡惟有高廟京兆府舍遂就都焉

袁宏後漢紀

二年夏四月董卓入長安

卓西入關將至公卿以下迎之皆謁拜車下卓不爲禮卓謂御史  
中丞皇甫嵩曰可以服未嵩曰安知明公乃至於是卓曰鴻鵠固



有遠志但燕雀自不知爾嵩曰昔與公俱爲鴻鵠但明公今日變  
爲鳳凰爾卓乃大笑曰卿早服何得不拜後漢紀

冬十月劉焉使張魯殺漢中太守蘇固斷斜谷閣

焉領益州牧陰啗異計沛人張魯母有姿色兼挾鬼道注來焉家  
遂任魯以爲督義司馬與別部司馬張修將兵掩殺漢中太守蘇  
固斷絕斜谷殺使者魯旣得漢中遂復殺張修而並其衆焉自此  
意氣轉盛遂造作乘輿時焉四子範爲左中郎將誕治書御史璋  
奉車都尉並在長安唯別部司馬瑁隨焉在益州朝廷使璋曉譬  
焉焉留不遣後漢書劉焉傳

三年春正月董卓築塢於郿

董卓築郿塢與長安城埒積穀爲三十年儲云事成雄據天下不  
成守此足以畢老嘗至郿行塢公卿以下祖道於橫門外卓豫施



帳幔飲誘降北地反者數百人於坐中先斷其舌或斬手足或鑿眼或鑊煮之未死偃轉桎梏案問而卓飲食自若

魏志董卓傳

夏四月王允使中郎將呂布誅董卓於掖門

初五原人呂布便弓馬膂力過人既殺丁原董卓信愛之誓爲父子卓自以遇人無禮恐人謀已行止常以布自衛卓性剛褊忿不思難嘗以小失意拔手戟擲布布捷避之爲卓致謝卓意亦解由是陰怨卓常使布守中閣布與卓侍婢私通恐事發覺心不自安司徒王允以布州里壯健厚接納之布詣允陳卓幾見殺狀允與僕射士孫瑞密謀誅卓是以告布使爲內應布曰奈如父子何允曰君自姓呂本非骨肉今憂死不暇何謂父子遂許之夏四月辛巳帝有疾旣瘳會羣臣於未央殿卓置衛自其營至於掖門士孫瑞使騎都尉李順

范書作李肅

將呂布親兵十人僞著衛士服于掖門



卓將出馬散不進卓怪之欲還布勸之遂行入門衛士以戟刺之卓衣內有鎧不入傷臂墜車大呼曰呂布何在對曰在此布曰有詔趣兵斬之卓罵曰庸狗敢如是耶遂斬之王允使人然火卓腹上臭乃埋之

袁宏後漢紀

卓既死當時日月清明微風不起宗族老弱

悉在郿皆還爲其群下所斫射

英雄記

五月董卓將李傕郭汜反攻長安六月戊午長安城陷故太尉黃琬司徒王允死之

董卓既死牛輔爲其麾下所殺李傕等還以輔死衆無所倚伏欲各散歸既無赦書而聞長安中欲盡誅涼州人憂恐不知所爲賈詡曰聞長安中議欲盡殺涼州人而諸君棄衆單行卽一亭長能束君矣不如率衆而西所在收兵以攻長安爲董公報仇幸而事濟奉國家以正天下若不濟走未晚也衆以爲然遂將其衆而西



所在收兵攻至長安衆十餘萬卓故部將樊稠等合兵圍長安六月戊午長安城陷呂布與戰不勝將數百騎奔冀州催等入城內殺太常种弗太僕魯馱大鴻臚周奩城門校尉崔烈越騎校尉王順死者數十人司徒王允挾乘輿上宣平城門允謂催等曰臣無作威作福而乃放兵縱火欲何爲乎催曰董卓忠於陛下而無辜爲呂布所殺欲爲卓報布不敢爲逆甲子殺故太尉黃琬司徒王允及其妻子衆庶爲之流涕

後漢紀

秋九月以馬騰爲將軍屯郿

董卓入關召韓遂馬騰以圖山東至會卓死催等皆以爲將遣遂

還留騰屯郿

綱目

興平元年春三月馬騰與李傕等戰於長平觀騰敗走

侍中馬宇與諫議大夫种邵左中郎將劉範等謀欲使騰襲長安



已爲內應以誅催等騰引兵至長平觀宇等謀泄奔槐里稠董卓將樊

稠擊騰騰敗走還涼州又攻槐里宇等皆死時三輔民尚數十萬

戶催等放兵劫畧攻剽城邑人民饑困二年間相啖食畧盡魏志董卓

傳○按長平坡名上有觀在池陽宮南去長安五十里

秋八月馮翊羌反

馮翊羌叛寇屬縣郭汜樊稠擊破之後漢書獻帝紀

二年春二月李催郭汜治兵相攻長安亂

二月乙亥李催殺樊稠而與郭汜相攻三月丙寅催脅帝幸其營

焚宮室後漢書獻帝紀汜與催轉相疑戰鬪長安中催質天子於營燒宮

殿城門畧官寺盡收乘輿服御物置其家催使公卿詣汜請和汜

皆執之相攻擊連月死者萬數魏志董卓傳

夏四月李催移帝幸北塢



四月丁酉郭汜攻李傕矢及御前是日李傕移北塢後漢書時帝獻帝紀

在南塢傕在北塢流矢中傕左耳乃迎帝幸北塢帝不肯從強之

乃行山陽公載記傕將楊奉與傕軍吏宋果等謀殺傕事泄遂將兵叛

傕傕眾叛稍衰弱魏志董卓傳

秋七月車駕東歸

張濟自陝和解之天子乃得出至新豐霸陵間郭汜復脅天子還

都鄙天子奔奉營奉擊汜破之汜走南山奉及將軍董承以天子

還洛陽魏志董卓傳傕汜等鬪長安中傕復請詡為宣義將軍傕等和

出天子祐護大臣詡有力焉是時將軍段熲屯華陰魏志賈詡傳初天

子出到宣平門當度橋汜兵數百人遮橋問是天子邪車不得前

傕兵數百人皆持大戟在乘輿車左右侍中劉艾大呼云是天子

也使侍中楊琦高舉車帷帝言諸兵汝不却何敢迫近至尊邪汜



等兵乃却既度橋士衆咸呼萬歲

獻帝起居注

八月甲辰幸新豐冬十

月戊戌郭汜使其將伍習夜燒所幸學舍逼脅乘輿楊定楊奉與

郭汜戰破之壬寅幸華陰露次道南是夜有赤氣貫紫宮張濟復

反與李傕郭汜合

後漢書獻帝紀

建安二年春以鍾繇督關中諸軍

時關中諸將馬騰韓遂等各擁強兵相與爭太祖方有事山東以

關右爲憂乃表繇以侍中守司隸校尉持節督關中諸軍委之以

後事持使不拘科制繇至長安移書騰遂等爲陳禍福騰遂各遣

子入侍

鍾繇傳

三年夏四月詔關西諸將討李傕誅之

建安三年遣謁者僕射裴茂率關西諸將誅傕夷三族汜爲其將

伍習所襲死於郿

魏志董卓傳



四年冬十一月曹操使治書侍御史衛覬鎮撫關中

太祖征袁紹而劉表爲紹援關中諸將又中立益州牧劉璋與表有隙覬以治書侍御史使益州令璋下兵以綴表軍至長安道路不通覬不得進遂留鎮關中

魏志衛覬傳

五年冬十月張魯據漢中

劉焉死子璋代立以魯不順盡殺魯母家室魯遂據漢中以鬼道教民自號師君其來學道者初皆名鬼卒受本道已信號祭酒各領部衆多者爲治頭大祭酒皆教以誠信不欺詐有病自首其過大都與黃巾相似諸祭酒皆作義舍如今之亭傳又置義米肉懸於義舍行路者量腹取足若過多鬼道輒病之犯法者三原然後乃行刑不置長吏皆以祭酒爲治民夷便樂之雄據巴漢垂三十二年民有地中得玉印者群下欲尊魯爲漢寧王魯功曹巴西閭圃



諫魯曰漢川之民戶出十萬財富土沃四面險固上匡天子則爲桓文次及竇融不失富貴今承制署置勢足斬斷不煩於王願且不稱勿爲禍先魯從之

魏志張魯傳

十六年春三月韓遂馬超反

建安十六年張魯據漢中三月遣鍾繇討之公使淵等出河東與繇會時關中諸將疑繇欲自襲馬超遂與韓遂楊秋李堪成宜等叛遣曹仁討之超等屯潼關公勅諸將關西兵精悍堅壁勿與戰

魏志武帝紀

太祖欲遣鍾繇等討張魯柔諫以爲今猥遣大兵西有

韓遂馬超謂爲已舉將相扇動作逆宜先招集三輔三輔苟平漢

中可傳檄而定也繇入關遂超等果反

高柔傳

秋七月曹操大破韓遂馬超於渭南

超等屯潼關秋七月公西征與超等夾關而軍公急持之而潛遣



徐晃朱靈等夜渡蒲阪津據河西爲營公自潼關北渡未濟超赴船急戰校尉丁裴因放牛馬以餌賊賊亂取牛馬公乃得渡循河爲甬道而南賊退拒渭口公乃多設疑兵潛以舟載兵入渭爲浮橋夜分兵結營於渭南賊夜攻營伏兵擊破之超等屯渭南遣使求割河以西請和公不許九月進軍渡渭超等數挑戰又不許因請割地求送任子公用賈詡計僞許之韓遂請與公相見公與遂父同歲孝廉又與遂同時儕輩於是交馬語移時不及軍事但說京都舊故附手歡笑旣罷超等問遂公何言遂曰無所言也超等疑之他日公又與遂書多所點竄如遂改定者超等愈疑遂公乃與克日會戰先以輕兵挑之戰良久乃縱虎騎夾擊大破之斬成宜李堪等遂超等走涼州楊秋走安定關中平

魏志武帝紀

許褚從討

韓遂馬超於潼關太祖將北渡臨濟河先渡兵獨與褚及虎士百



餘人留南岸斷後超將步騎萬餘人來奔太祖軍矢下如雨褚白

太祖賊來多今兵渡已盡宜去乃扶太祖上船賊戰急軍爭濟船

重欲沒褚斬攀船者左手舉馬鞍蔽太祖船工爲流矢所中死褚

右手並沂船乃僅得渡是日微褚幾危

許褚傳

公軍每渡渭輒爲超

騎所衝突營不得立地又多沙不可築壘婁子伯曰今天寒起沙

爲城以水灌之可一夜而成公從之乃作纊囊以運水夜渡兵作

城比明城立由是公軍盡得渡渭

曹瞞傳

徐奕太祖爲司空辟爲掾

屬從西征馬超超破軍還時関中新服未安留奕爲丞相長史鎮

撫西京西京稱其威信轉爲雍州刺史

徐奕傳

十二月曹操留夏侯淵屯長安以張既爲京兆尹

十月操自長安北征楊秋降十二月操自安定還留夏侯淵屯長

安以議郎張既爲京兆尹

通鑑



十七年春以夏侯淵行護軍將軍破南山賊降之

太祖還鄴以淵行護軍將軍督朱靈路招等屯長安擊破南山賊

劉雄降其衆

魏志夏侯淵傳

秋七月夏侯淵破馬超於藍田

馬超餘衆屯藍田夏侯淵擊平之

魏志武帝紀

鄜賊梁興作亂左馮翊鄭渾討平之

鄜賊梁興寇掠馮翊諸縣恐懼皆寄治郡下議者以爲當移就險阻左馮翊鄭渾曰興等破散藏竄山谷雖有隨者率脅從耳今當廣開降路宣諭威信而保險自守此示弱也乃聚吏民治城郭爲守備募民逐賊得其財物婦女十以七賞民大悅皆願捕賊賊失妻子者皆還求降渾責其得他婦女然後還之於是轉相寇盜黨與離散又遣吏民有恩信者分布山谷告諭之出者相繼乃使諸



縣長吏各還本治以安集之興將餘衆聚鄜城操使夏侯淵助渾

討之軌與餘黨悉平

通鑑。按通鑑云鄭渾斬興於郿城而魏志云夏侯淵斬興於郿互異

十九年春馬超奔漢中

十九年趙衢尹奉等謀討超姜叙起兵鹵城以應之衢等譎說超使出擊叙於後盡殺超妻子超奔漢中還圍祁山叙等急求救諸將議者欲湏太祖節度淵曰公在鄴反覆四千里比報叙等必敗非救急也遂行使張郃督步騎五千在前從陳倉狹道入淵自督糧在後郃至渭水上超將氐羗數千逆郃未戰超走郃進軍收超軍器械

魏志夏侯淵傳

二十年秋七月曹操破漢中冬十一月張魯降

二十年三月公西征張魯至陳倉將自武都入氐人塞道先遣張郃朱靈等攻破之夏四月公自陳倉以出散關至河池氐王寶



茂衆萬餘人恃險不服五月公攻屠之秋七月公至陽平張魯使

弟衛與將楊昂等據陽平關橫山築城十餘里攻之不能拔乃引

軍還賊見大軍退其守備解散公乃密遣解慄高祚等乘險夜襲

大破之斬其將楊任進攻衛衛等夜遁魯潰奔巴中公軍入南鄭

盡得魯府庫珍寶十一月魯自巴中將其餘衆降封魯及五子皆

爲列侯十二月公自南鄭還留夏侯淵屯漢中魏志武帝承涼

州從事及武都降人之辭說張魯易攻陽平城下南北山相遠不

可守也信以爲然及往臨履不如所聞乃嘆曰他人商度少如人

意攻陽平山上諸屯旣不時拔士卒傷夷者多武帝意沮便欲拔

軍截山而還遣故大將夏侯惇將軍許褚呼山上兵還會前軍未

還夜迷惑誤入賊營賊便退散侍中辛毗劉曄等在兵後語惇褚

言官兵已據得賊要屯賊已散走猶不信之惇前自見乃還白武



帝進兵定之幸而克獲

魏名臣奏議

魯聞陽平已陷乃奔南山入巴中

左右欲悉燒寶貨倉庫魯曰本欲歸命國家而意未達今之走避銳鋒非有惡意寶貨倉庫國家之有遂封藏而去太祖入南鄭甚嘉之又以魯本有善意遣人慰喻魯盡將家出太祖逆拜魯鎮南將軍待以客禮封閬中侯

張魯傳

以趙儼統閬中軍

趙儼遷扶風太守太祖徙故韓遂馬超等兵五千餘人使平難將軍殷署等督領以儼爲閬中護軍盡統諸軍羗虜數來寇害儼率署等追到新平大破之屯田客呂並自稱將軍聚黨據陳倉儼復率署等攻之賊卽破滅時被書差千二百兵往助漢中守署督送之行者卒與室家別皆有憂色署發後一日儼慮其有變乃自追至斜谷口人人慰勞又深戒署還宿雍州刺史張旣舍署軍復前



四十里兵果叛亂未知署吉凶而儼自隨步騎百五十人皆與叛者同部曲或婚姻得此問各驚被甲持兵不復自安儼欲還旣等以爲今本營已亂一身赴之無益可湏定問儼曰雖疑本營與叛者同謀要當聞行者變乃發之又有欲善不能自定宜及猶豫促撫寧之且爲之元帥旣不能安輯身受禍難命也遂去行三十里止放馬息盡呼所從人喻以成敗慰勵懇切皆慷慨曰死生當隨護軍不敢有二前到諸營各名料簡諸姦結叛者八百餘人散在原野惟取其造謀魁率治之餘一不問郡縣所收送皆放遣乃卽相率還降儼密白宜遣將詣大營請舊兵鎮守關中太祖遣將軍劉柱將二千人當湏到乃發遣而事露諸營大駭不可安喻儼謂諸將曰舊兵旣少策兵未到是以諸營圖爲邪謀若或成變爲難不測因其狐疑當令早決遂宣言當差留新兵之溫厚者千人鎮



守關中其餘悉遣東便見主者內諸營兵名籍案累重立差別之  
留者意定與儼同心其當去者亦不敢動一日盡遣上道因使所  
留千人分布羅落之東兵尋至乃復脅喻並徙千人令相及共東  
凡所全致二萬餘口

魏志趙儼傳

二十二年夏四月劉備進兵漢中

法正說劉備曰曹操一舉而降張魯定漢中不因此勢以圖巴蜀  
而留夏侯淵張郃屯守身遽北還非其智不逮而力不足也必將  
內有憂逼故耳今策淵郃才畧不勝國之將帥舉衆往討必可克  
之克之之日廣農積穀觀釁伺隙上可以傾覆寇敵尊獎王室中  
可以蠶食雍涼廣拓境土下可以固守要害爲持久之計此蓋天  
以與我時不可失也備乃進兵遣張飛馬超吳蘭等屯下辨操遣

曹洪拒之

通鑑



二十三年夏四月劉備次陽平關擊張郃等不克

建安二十三年先主率諸將進兵漢中分遣將軍吳蘭雷銅等入

武都皆爲曹公軍所沒先主次於陽平關與淵等相拒

蜀志先主傳劉

備屯陽平關張郃屯廣石備攻之不能克急書發兵諸葛亮以問

楊洪洪曰漢中益州咽喉存亡之機會若無漢中則無蜀矣此家

門之禍也發兵何疑

通鑑

太祖還鄴留晃與夏侯淵拒劉備於陽平

備遣陳式等十餘營絕馬鳴閣道晃別征破之賊自投山谷多死

者太祖聞甚喜假晃節令曰此閣道漢中之險要咽喉也劉備欲

斷絕外內以取漢中將軍一舉克奪賊計善之善者也

魏志徐晃傳

秋九月曹操西征至長安

秋七月治兵遂西征劉備九月至長安

魏志武帝紀

二十四年春正月劉備擊夏侯淵於定軍山斬破之



自陽平南渡沔水緣山稍前於定軍山勢作營淵將兵來爭其地

先主命黃忠乘高鼓譟攻之大破淵軍斬淵

蜀志先主傳

郭淮從征漢

中爲淵司馬淵遇害軍中擾擾淮推將軍張郃爲軍主諸營乃定

其明日備欲渡漢中來攻諸將議衆寡不敵欲依水爲陣以拒之

淮曰此示弱而不足挫敵非算也不如遠水爲陣引而致之半濟

而後擊備可破也既陣備疑不渡淮遂堅守示無還心以狀聞太

祖善之

魏志郭淮傳○按華陽國志漢中沔陽縣有定軍山北臨沔水

三月曹操出斜谷趙雲擊其軍敗之夏五月劉備取漢中

曹公自長安舉衆南征先主遙策之曰曹公雖來無能爲也我必

有漢川矣及曹公至先主歛衆拒險終不交鋒

蜀志先主傳

夏侯淵敗

曹公爭漢中地運米北山下數千萬囊黃忠以爲可取雲兵隨中

取米忠過期不還雲將數十騎輕行出圍迎視忠等值曹公



大出雲爲公前鋒所擊方戰其大衆至勢偏遂前突其陣且鬪且却公軍散已復合雲陷敵還趣圍將張著被創雲復馳馬還營迎著公軍追至圍此時沔陽長張翼在雲圍內翼欲閉門拒守而雲入營更大開門偃旗息鼓公軍疑雲有伏兵引去雲擂鼓震天惟以戎弩於後射公軍公軍驚駭自相蹂踐墮漢水中死者甚多先主明日自來至雲圍視昨戰處曰子龍一身都是膽也作樂飲宴至暝軍中號雲爲虎威將軍趙雲別傳操與備相守積月魏軍士多亡夏五月操悉出漢中諸軍還長安劉備遂有漢中通鑑先主欲與曹公爭漢中問群群曰當得其地不得其民也若出偏軍必不利當戒慎之時州後部司馬蜀郡張裕亦曉占候而天才過群諫先主曰不可爭漢中軍必不利先主竟不用裕言果得地而不得民也

周群傳



秋七月劉備自立為漢中王以魏延鎮漢中

先主有漢中羣下上先主為漢中王遂於沔陽設壇場陳兵列衆

羣臣陪位讀奏訖御王冠於先主先主上言漢帝上還所假左將

軍宜城亭侯印綬拔魏延為都督鎮漢中蜀志先主傳先主為漢中王

當得重將以鎮漢州乃拔延為鎮遠將軍領漢中太守一軍皆驚

先主大會群臣問延曰今委卿以重任卿居之欲云何延對曰若

曹操舉天下而來請為大王拒之偏將十萬之衆至請為大王吞

之先主稱善衆咸壯其言蜀志魏延傳

**蜀漢**按三國紛爭土宇割裂獻帝未廢之先雖王綱不振猶奉正朔故得秉筆而書之迨山陽就封而正朔茂行矣紫陽綱目繼絕

筆於獲麟乃以蜀係之正統蓋為天下萬世而作也至陝志所以紀陝事當日蜀魏分據其地即因事以紀年不敢妄擬綱目

亦紀實也至於兩國交構雖因地分紀而年號則仍兩存之以便考訂後悉倣此例

後主建興五年魏明帝太和元年春三月丞相亮出屯漢中



丞相亮出屯漢中營沔北陽平石馬

蜀志後主傳

趙雲遷鎮東將軍建

興五年隨諸葛亮駐漢中

趙雲傳

亮屯於陽平遣魏延諸將並兵東

下亮惟留萬人守城晉宣帝率二十萬衆拒亮而與延軍錯道徑

至前當亮六十里所偵候白宣帝說亮在城中兵少力弱亮亦知

宣帝垂至已與相偪欲前赴延軍相去又遠回迹反追勢不相及

將士失色莫知其計亮意氣自若勅軍中皆卧旗息鼓不得妄出

菴幔又令大開四城門掃地却灑宣帝嘗謂亮持重而猥見勢弱

疑其有伏兵於是引軍北趣山明日食時亮謂參佐拊手大笑曰

司馬懿必謂吾怯將有彊伏循山走矣候邏還白如亮所言

郭冲三事

六年

魏太和二年

春正月丞相亮由斜谷道伐魏軍敗亮拔西縣而還

夏侯楙爲安西將軍鎮長安亮於南鄭與群下計議延曰聞夏侯

楙少主婿也怯而無謀今假延精兵五千負糧五千直從褒中出



循秦嶺而東當子午而北不過十日可到長安楸聞延奄至必乘  
 船逃走長安中惟有御史京兆太守耳橫門邸閣與散民之穀足  
 周食也比東方相合聚尚二十許日而公從斜谷來必足以達如  
 此則一舉而咸陽以西可定矣亮以為此縣危不如安從坦道可  
 以平取隴右十全必克而無虞故不用延計魏畧六年春揚聲由斜  
 谷道取郿使趙雲鄧芝為疑軍據箕谷一統志云箕谷在褒城縣北十五里魏大將  
 軍曹真舉眾拒之亮攻祁山南安天水安定三郡叛魏應亮關中  
 響震魏明帝西鎮長安命張郃拒亮亮使馬謖督諸軍在前與郃  
 戰於街亭謖違亮節度舉動失宜大為郃所破亮拔西縣西縣今興安州  
 是千餘家還於漢中蜀志諸葛亮傳

七年冬十二月築漢樂二城

丞相亮徙府營於南山下原上築漢城於沔陽樂城於城固通鑑



八年魏太和四年秋八月魏侵漢中丞相亮出次城固九月魏師還

曹真以蜀連侵邊境宜遂伐之數道並入可克也帝從其計真當

發西討帝親臨送真八月發長安從子午道南入司馬宣王泝漢

水當會南鄭諸軍或從斜谷道或從武威入會霖雨三十餘日詔

還魏志曹真傳八年秋魏使司馬懿由西城張郃由子午曹真由斜谷

欲攻漢中丞相亮待之於城固赤坂赤坂在漢中府洋縣東二十里大雨道絕真

等皆還是歲魏延破魏雍州刺史郭淮於陽谿蜀志後主傳夏侯霸字

仲權淵為蜀所害霸常切齒欲有報蜀意黃初中為偏將軍子午

之役霸召為前鋒進至興勢圍安營在曲谷中蜀人望知其是霸

也指下兵攻之霸手戰鹿角間賴救至然後解魏略

十二年魏青龍二年春二月丞相亮由斜谷伐魏

初亮勸農講武作木牛流馬運米集斜谷口治邸閣息民休士三



年而後用之至是悉衆十萬由斜谷伐魏遣使約吳同時大舉通鑑  
夏四月丞相亮進軍渭南魏大將軍司馬懿引兵拒之

亮悉大衆由斜谷出以流馬運據武功五丈原與司馬宣王對於

渭南亮每患糧不繼使已志不伸是以分兵屯田爲久住之基耕

者雜於渭濱居民之間而百姓安堵軍無私焉蜀志諸葛亮傳青龍二年

四月諸葛亮出斜谷屯渭南司馬宣王率諸軍拒之詔宣王但堅

壁拒守以挫其鋒彼進不得志退無與戰久停則糧盡虜畧無所

獲則必走走而追之以逸待勞全勝之道也魏志明晉宣帝西屯

長安青龍二年亮帥衆十餘萬出斜谷壘於郿之渭水南原天子

憂之遣征蜀護軍秦朗步騎二萬受帝節度諸軍欲往渭北以待

之帝曰百姓積聚多在渭南此必爭之地也遂引軍而濟背水爲

壘因謂諸將曰亮若勇者當出武功依山而東若西上五丈原則



諸軍無事矣亮果上原將北渡渭帝遣將軍周當屯陽遂以餌之數日亮不動帝曰亮欲爭原而不向陽遂此意可知也遣將軍胡遵雍州刺史郭淮共備陽遂與亮會於積石臨原而陣亮不得進還於五丈原

魏略

秋八月丞相亮卒於軍師還魏延作亂斬之

亮既屢遣使交書又致巾幘婦人之飾以怒宣王宣王將出戰辛毗杖節奉詔勒宣王及軍吏已下乃止宣王見亮使唯問其寢食及其事之煩簡不問戎事使對曰諸葛公夙興夜寐罰二十已上皆親覽焉所啖食不過數升宣王曰亮體斃矣其能久乎

魏氏春秋

陽秋曰有星赤而芒角自東北西南流投於亮營三投再還往大還小俄而亮卒

蜀志諸葛亮傳注

亮卒於郭氏塢楊儀等整軍而出百姓

奔告宣王宣王追焉姜維令儀反旗鳴鼓若將向宣王者宣王乃



退不敢偏於是儀結陣而去入谷然後發喪宣王之退也百姓爲

之諺曰死諸葛走生仲達或以告宣王宣王曰吾能料生不能料

死也漢晉春秋亮出北谷口延爲前鋒秋亮病困密與長史楊儀司馬

費禕護軍姜維等作身歿之後退軍節度令魏延斷後姜維次之

若延或不從命軍便自發亮適卒秘不發喪儀令禕往揣延意指

延曰丞相雖亡吾自見在府親官屬便可將喪還葬吾自當率諸

軍擊賊云何以一人死廢天下之事耶且魏延何人當爲楊儀所

部勒作斷後將乎因與禕共作行留部分令禕手書與已連名告

下諸將禕給延曰當爲君還解楊長史長史文吏稀更軍事必不

違命也禕出門馳馬而去延尋悔追之已不及矣延遣人覘儀等

遂使欲案亮成規諸營相次引軍還延大怒纔儀未發率所領徑

先南歸所過燒絕閣道延儀各相表叛逆一日之中羽檄交至後



主以問侍中董允留府長史蔣琬琬允咸保儀疑延儀等槎山通  
道晝夜兼行亦繼延後延先至據南谷口遣兵逆擊儀等儀等令  
何平在前禦延平叱延先登曰公亡身尚未寒汝輩何敢乃爾延  
士衆知曲在延莫爲用命軍皆散延獨與其子數人逃狂奔漢中  
儀遣馬岱追斬之

魏延傳○按何平卽王平本傳  
平少養外家何氏後復姓王

將軍吳壹屯漢中

以左將軍吳壹爲車騎將軍假節督漢中

蜀志後  
主傳

延熙元年冬十二月大將軍蔣琬屯漢中

延熙元年詔琬曰寇難未弭曹叡驕凶遼東三郡苦其暴虐遂相  
糾結與之離隔叡大興兵役還相攻伐曩秦之亡勝廣首難今有  
此變斯乃天時君其治嚴總帥諸軍屯住漢中須吳舉動東西掎  
角以乘其釁又命琬開府明年就加爲大司馬

蜀志蔣  
琬傳



六年冬十月遣前監軍王平督漢中

六年琬還住涪拜平前監軍鎮北大將軍統漢中

蜀志王平傳

七年

魏邵陵厲公正始五年

春三月魏曹爽攻漢中閏月費禕督諸軍救之五

月魏軍退走

七年春魏大將軍曹爽率步騎十餘萬向漢川前鋒已在駱谷

在

屋縣西南一百二十里

時漢中守兵不滿三百諸將大驚或曰今力不足以

拒敵聽當固守漢樂二城遇賊今入比爾間涪軍足得救閑平曰

不然漢中去涪垂千里賊若得閑便為禍也今宜先遣劉護軍杜

叅軍據興勢平為後拒若賊分向黃金平率千人下自臨之比爾

間涪軍行至此計之上也惟護軍劉敏與平意同即便施行

蜀志王平

傳

劉敏與鎮北大將軍王平俱鎮漢中曹爽襲蜀時議者或謂但

可守城不出拒敵必自引退敏以為男女布野農穀栖畝若聽敵



入則大事去矣遂帥所領與平據興勢多張旗幟彌亘百餘里會

大將軍費禕從成都至魏軍即退敏以功封雲亭侯

蔣琬傳附

魏軍次

於興勢假禕節率眾往禦之光祿大夫來敏至禕許別求共圍碁

于時羽檄交馳人馬擐甲嚴駕已訖禕與敏留意對戲色無厭倦

敏曰向耶觀試君耳君信可人必能辦賊者也禕至敵遂退

費禕傳

是時關中及氐羌轉輸不能供牛馬騾驢多死民夷號泣道路入

谷行數百里賊因山為固兵不得進爽叅軍楊偉為爽陳形勢宜

急還不然將敗爽乃引軍還

魏志曹爽傳

司馬宣王謂夏侯元曰昔武

皇帝再入漢中幾至大敗君所知也今興平路勢至險蜀已先據

若進不獲戰退見徼絕覆軍必矣將何以任其責元懼言於爽引

軍退費禕進兵據三嶺以截爽爽爭險苦戰僅乃得過所發牛馬

運轉者死失畧盡羌胡怨嘆而關右悉虛耗矣

魏畧



十一  
年夏五月大將軍費禕屯漢中

禕出住漢中自琬及禕雖身居於外慶賞刑威皆遙先諮斷然後

乃行禕雅性謙素當國功名畧與琬比

通鑑

景耀元年十二月詔漢中兵屯漢壽守漢樂二城

景耀元年維復拜大將軍初先主留魏延鎮漢中皆實兵諸圍以禦外敵敵若來攻使不得入及興勢之役王平捍拒曹爽皆承此制維建議以爲錯守諸圍雖合周易重門之義然適可禦敵不獲大利不若使聞敵至諸圍皆歛兵聚穀退就漢樂二城使敵不得入平日重閑鎮守以捍之有事之日令遊軍並進以伺其虛敵攻閑不克野無散穀千里縣糧自然疲乏引退之日然後諸城並出與遊軍並力搏之此殄敵之術也於是令督漢中胡濟却住漢壽監軍王含守樂城護軍蔣斌守漢城又於西安建威武衛石門武



城建昌臨遠皆立圍守

蜀志姜維傳

炎興元年

魏陳留王景元四年

秋魏遣鄧芝鍾會入寇漢中守將傅僉死之

四年秋下詔使鄧芝諸葛緒各統諸軍三萬餘人艾趣甘松沓中連綴維緒趣武街橋頭絕維歸路會統十餘萬衆分從斜谷駱谷入先命牙門將許儀在前治道會在後行而橋穿馬足陷於是斬儀儀者許褚之子有功王室猶不原貸諸軍聞之莫不震竦蜀令諸圖皆不得戰退還漢樂二城守魏興太守劉欽超子午谷諸軍數道平行至漢中蜀監軍王含守樂城護軍蔣斌守漢城兵各五千會使護軍荀愷前將軍李輔各統萬人愷圍漢城輔圍樂城會徑過西出陽安口遣人祭諸葛亮之墓使護軍胡烈等行前攻破關城得藏庫積穀姜維欲赴關城未到聞其已破退超白水與蜀將張翼廖化等合守劔閣拒會

魏志鍾會傳

鍾會將向駱谷鄧艾將向



沓中然後乃遣右車騎麴允詣沓中爲維援左車騎張翼輔國大將軍董厥等詣陽安關口以爲諸圍外助比至陰平聞魏將諸葛緒向建威故住待之月餘維爲鄧艾所摧還住陰平鍾會攻圍漢樂二城遣別將進攻關口蔣舒開城出降傳僉格鬪而死

蜀志姜維傳

蔣舒將出降乃詭謂傳僉曰今賊至不擊而閉城自守非良圖也僉曰受命保城惟全爲功今違命出戰若喪師負國死無益矣舒曰子以保城獲全爲功我以出戰克敵爲功請各行其志遂率衆出僉謂其戰也至陰平以降胡烈烈乘虛襲城僉格鬪而死魏人

義之

漢晉春秋

**魏**

明帝太和二年

蜀後主建興六年

春三月使將軍郝昭守陳倉

曹真以亮懲於祁山後出必從陳倉使將軍郝昭王生守陳倉治



其城魏志曹真傳

冬十二月諸葛亮攻陳倉不克

六年冬亮復出散關圍陳倉曹真拒之亮糧盡而還魏將王雙率

軍追亮亮與戰破之

蜀志亮傳

先是使將軍郝昭築陳倉城會亮至圍

昭不能拔昭爲人雄壯亮使昭鄉人靳詳於城外遙說之昭於樓

上應詳曰魏家科法卿所練也我之爲人卿所知也我受國恩多

而門戶重卿無可言者但有死耳卿還謝諸葛便可攻也詳以昭

語告亮亮又使詳重說昭言人兵不敵無爲空自破滅昭謂詳曰

前言已定矣我識卿耳箭不識也詳乃去亮自以有衆數萬而昭

兵纔千餘人又度東救未能便到乃進兵攻昭起雲梯衝車以臨

城昭以火箭逆射其雲梯梯然梯上人皆燒死又以繩連石磨壓

其衝車衝車折亮乃更爲井闌百尺以射城中以土瓦填塹欲直



攀城昭又於內築重牆亮又爲地突欲踊出於城裏昭又於城內穿地橫截之晝夜相攻拒二十餘日亮無計救至引退詔嘉昭善守賜爵列侯魏畧

五年

蜀建興九年

春二月使司馬懿屯長安

漢丞相亮帥諸軍入寇於是大司馬曹真有疾帝命司馬懿西屯長安督將軍張郃費曜戴凌郭淮等以禦之通鑑

邵陵厲公嘉平元年

蜀延熙十二年

秋蜀姜維寇雍州不克

陳泰代郭淮爲雍州刺史姜維率衆依麴山築二城使牙門將句

安李歆守之聚羌胡質任等寇逼諸郡征西將軍郭淮使泰率討

蜀護軍徐質汝南太守鄧艾等進兵圍之斷其運道及城外流水

安等挑戰不許將士困窘分糧聚雪以稽日月維果來救出自牛

頭山

一統志云牛頭山在漢中府褒城縣西北二十五里以形似名

與泰相對泰勅諸軍各堅壘



勿與戰遣使白淮使趣牛頭山截其歸路淮善其策進率諸軍軍

洮水維懼遁去安等孤縣遂皆降

魏志陳群傳附

高貴鄉公甘露二年

蜀延熙二十年

夏六月姜維來侵大將軍司馬望拒之

二十年魏征東大將軍諸葛誕反於淮南分關中兵東下維欲乘

虛向秦川復率數萬人出駱口徑至沈嶺時長城積穀甚多而守

兵乃少聞維方到衆皆惶懼魏大將軍司馬望拒之鄧艾亦自隴

右皆軍於長城維前住芒水皆倚山爲營望艾傍渭堅圍維數下

挑戰望艾不應

蜀志姜維傳○按水經注芒水出南山芒谷

陳留王咸熙元年春正月車駕如長安

正月甲子行幸長安壬申使使者以璧幣祀華山

魏志陳留王紀



百進士喬履信編



